

Waor of niet waor?

Dick van Bloemendaal; tekening: Gerard Schut

Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Veur julie un vraag, mar veur mien un weet, welke wel of niet waor bin.

Vissende vrienden

Toen de Flevopolders dur nog niet waren ha'je bie ut Oever vlak bie Putten de kust van ut IJsselmeer.

Bie zwaor weer ging de zee, zoas wulie dat toen noemden, hevig te keer mit hoge golven en witte schuumpoppen dur op.

An ut eind van 't Oeverstraot stung ut theepaviljoen van Ben Dunnewiend waor je gezellig kossen zitten en genieten van ut mooie uutzicht over ut waoter.

Ben verhuurde ok kano's en kleine bootjes, wat bie zoemerdag aordig oftrek had.

Ut paviljoen stung op paolen um te veurkommen dat bie zwaor weer de boel zou overstromen en de boten laggen niet an de kant mar an kettingen of touwen in ut waoter .

Dur lag ok un boot die un paor burens samen 'ekocht han um te vissen.

Gait, Garrit, Reint en Thijs waren niet alleen burens mar ook goeie vrienden die elke zaoterdagmorgen mit zun vieren gingen vissen.

Ze kregen un pakje brood mit un kan koffie mee want ze gingen al vrog op pad en kwammen niet al te vrog weer naor huus toe.

Reint was de kapitein want die kwam van de grote vaort of en had verstand van vaoren en zat dus altied an ut roer.

Gait was un beetje un drieterd en zat greeg in ut midden van de boot.

Op un keer mos Gait nodig uut de broek en dat mos buutenboord gebeuren. Mit z'n broek op z'n hakken zat hie mit z'n koent overboord en toen begonnen Garrit en Thijs te schommelen zodat de boot aordig schuin in ut waoter kwam en Gait un natte poeperd


kreeg.

Hie het toen woorden gebruikt die niet al te netjes waren en z'n vrienden hen'um aordig uut zitten lachen.

Reint zeit nog "Kiek uut Gait, dur zitten hier veul snoeken en as die un pier zien dan happen ze dur naor".

Naodat ze un paor neutjes in'eneumen han werd de vrede weer 'etekend.

Thijs kos un keer niet mee want hie mos mit zun vrouw naor ut darp um nie grei vur hum te kopen en dat leek Thijs helemaal niet. Hie beloofde Miep dat hie disse keer goed zun best zou doen mit vissen en mit un paor paolingen tuus zou kommen en toen bin ze



Vissende vrienden, getekend door Gerard Schut uit Eerbeek

samen mar un are keer wezen winkelen.

Ut beroerde was dat ze die dag geen paoling 'evungen hen en Thijs had dus un probleem.

Mar door wis Garrit wel wat op. Hie zou wel

un paor varse paolingen bie de viskeet van Beerd Mosterd naost de ouwe kark haolen as ze bie De Heerdt ut leste ofzakkertsje zouwen nemen.

Toen ze bie Garrit van Dam an de toog zatten is Garrit effe naor Beerd 'elopen en vertelde daor waarom hie die vis nodig had want Beerd mos ze niet in vetvrie pepier doen mar in un ouwe krant wikkelen.

Beerd het dat verzorgd mar hie het dur ok un gerookte paoling bie in 'edaon zonder daor iets van te zegen.

Blie dat alles goed veurmekaar was bin ze daornao op huus an 'egaon.

Toen Thijs tuus kwam zei hie dat dur goed 'evungen was en gaf de krant mit paoling an zun vrouw.

Toen Miep de krant uut'ewikkeld had zag ze die gerookte paoling en wis ze geliek dat ze in ut ootje 'eneumen werd.

Thijs het toen alles eerlijk verteld en ze hen dur samen harteluk um 'elachen.

+++